

Vršnjačko nasilje

Sa vršnjačkim nasiljem se svakodnevno susrećemo, a opet je to tema koja se zaobilazi.

Zašto mislim tako? Sigurno se postavlja pitanje. Vrlo je jednostavno, ja sam bila žrtva nasilja. I moja tema se često zaobilazila. Samo želim da kažem NIKAD, ali NIKAD ne šutite na ovu temu.

Koliko god bila bolna i koliko god ostavila ova tema posljedice, treba pričati i podizati nivo svijesti mladima, da nikada ne šute kada je riječ o ovoj temi.

Moja priča je počela još u osnovnoj školi. (Školu neću imenovati, ni ljude, dat ću izmišljena imena, čak neću imenovati ni naselje u koje sam se tada doselila. Čisto zbog neke svoje privatnosti i sigurnosti). Kao dijete roditelja koji puno rade, često sam bila sama kući, pa sam tako bila prepuštena sama sebi. Bila sam sedmi razred kada sam se doselila u to naselje. Moja škola je bila na poprilično dobrom glasu, kao jedna vrlo jaka osnovna škola.

Prvi dan nastave u školi sam bila izgubljena i preplašena zbog prihvatanja ili neprihvatanja od strane vršnjaka. Odmah su me prihvatili i bila sam u centru pažnje. Na velikim odmorima sam se družila s Elmom, Naidom, Lamijom i pričali smo o tome kako mi je bilo u prethodnoj osnovnoj školi i kakav sam bila učenik. Zaista se nikada nisam htjela isticati u osnovnoj školi i bila sam uvijek vrlo dobar učenik.

Na tom velikom odmoru bila je jedna lijepa crnokosa djevojka. Preljepih krupnih očiju, malo većeg nosa, ali taj nos se uklapao u njene crte lica. Bila je sama, kao da se cijeli svijet okrenuo protiv nje i niko se nije htio družiti sa njom.

Moje tadašnje školske drugarice su mi rekle da se sa njom ne treba družiti i da se niko ni ne druži jer je loša i pala je razred, čak i to da mnoge ružne priče kruže o njoj.

Ja, kao osoba koja ne sluša druge kada je upitanju mišljenje o nekom drugom, ja kao biće jakog karaktera i divnih osobina koja ne može gledati nekoga sa strane tek tako, a da mu ne pomogne, ipak sam odlučila prići toj djevojci.

Bila je tada poprilično kulturna, vrlo interesantna i zvala se Amila. Nazirala se neka tuga u njenim očima koja mi je govorila „molim te druži se sa mnom“.

Naravno da smo se počele družiti. Bog zna zašto! Trebao me je vrag odnijeti istog trena, a ne da prolazim cijeli taj kaos i pakao!!!!

Upoznavala me sa dosta ljudi. Bježale smo iz škole i bila sam također na lošem glasu. Ocjene su otišle naniže, a mojeg prisustva na nastavi skoro da nije bilo.

Pakao je počeo 13.02.2015.godine.

Pobjegle smo iz škole i bile smo kod nje u stanu gdje su bila dva momka koje smo poznavale.

Ja sam tek tada shvatila da trebam da se izvučem iz svega ovoga jer mi nisu trebali problemi, ali bilo je kasno.

Jedan momak je rekao da bi bio sa mnom jer sam vrlo kulturna za razliku od Amile, i naravno, ona se naljutila jer je bila zaljubljena u njega! Gurnula me i rekla da se ne želi družiti sa mnom i počela je psovati.

Posramila sam se, ko zna zbog čega. Vjerovatno zbog svega što sam uradila i što nije bilo povratka u školu i ocjenama, jer su me i nastavnici maltretirali!

Isti taj dan, tačno se sjećam da je bilo 17.00 sati, počele su mi dolaziti razne notifikacije na mobitel. Nisam znala šta se dešava. Ušla sam na facebook jer je tada baš bio aktuelan i imala sam šta vidjeti. MOJE FOTOSHOPIRANE FOTOGRAFIJE! I jedan ogroman opis, reći ću Vam koji jer nema potrebe da te neke detalje skrivam. Vjerujem da su mnoge djevojke/djevojčice prošle kroz to, ne daj Bože i gore, i želim da im dam do znanja da trebaju pričati o tome, nije njihova sramota!

OPIS: "Gubi se nevinost u 12stoj godini". Grozan opis i grozni komentari. NE možete se nikome opravdati, jer slika je grozna i govori više od 1000 riječi! Taj dan sam dobila toliko groznih poruka, čak i poruka prijatni za koje, naravno, nisam nikome rekla do sada.

U školu sam dolazila pognute glave jer bi me na svakom čošku neko pitao tako proste stvari, da bih otišla iz škole. Neko vrijeme sam se pravila bolesna i bila sam mnogo depresivna.

Niko se nije htio družiti sa mnom, bila sam maltretirana od strane Amile svaki dan!

Pošto se sve to saznalo kasnije, jer priče se nisu mogle utišati, razgovarala sam sa pedagogicom škole i pokušala sam se udaljiti od svega toga. Ali upravnici škole, navodno, nisu „mogli“ ništa poduzeti jer je njen tata kriminalac i slične neke priče, pa sam ja dobijala savjete da „kuliram“ i da trebam potražiti pomoć psihijatra.

Divna škola, zar ne?!

Moje kuliranje je dovelo do fizičkog maltretiranja. I tu sam stavila jednu veliku tačku i rekla: E NEĆEŠ!

Taj dan sam promijenila sebe, ubila sam tu Ajlu, okrenula novi list i napravila novi život.

Kulirala sam, učila, prijavljivala sam se na razne sekcije. Uspjela sam! Tu djevojku nisam vidjela od 2016. godine. Završila sam osnovnu školu i počela novi život. Sjećate li se kada sam Vam napisala da sam bila vrlodobar učenik!?! E, poslije svega toga sam se zainatila i rekla sam: Bit ćeš najbolja, bit ćeš ono što si uvijek trebala i nećeš odustati dok ne pokažeš svima da ti nisi propalica kakvom te smatraju.

I znate šta? Uspjela sam. Sada sam odlikaš, ganjam svoje ciljeve. Sportist sam, volim da crtam i imam ogromne planove za sebe u budućnosti. Prošlost sam potisnula, ali na ovu temu sam se morala odazvati i dati podršku svim djevojkama, djevojčicama, dječacima, da nikad ne šute i da se bore, jer oni nisu onakvi kakvima ih drugi predstavljaju! A šta se desilo sa djevojkom Amilom? Samo ću Vam reći da je Bog uradio svoje, ili ti karma. Pa ko u šta vjeruje.

Osobe koje su me pljuvale, danas ne poznajem. Osnovnu školu ne posjećujem, niti ću.

Živim život punim plućima i jako sam sretna. Neke se stvari dešavaju sa razlogom i možete iz toga ili izvući pouku ili pasti na još veće dno!

Nikada ne šutite na bilo kakav vid nasilja. Ja sam napravila grešku i šutjela sam i bila maltretirana i psihički i fizički, a i moj moral su doveli u pitanje! Uvijek pričajte sa nekim i shvatite da su ljudi koji vam čine zlo stvarni ljudi koji imaju mnogo problema i trebate ih jako zagrliti i reći: Nisi sam! Pomozite im, jer oni su izgubljeni, ali nemojte sebe toliko davati u to, jer osoba koja misli dobro pretežno i najviše ispašta!

Ajla Delić IVE

Željeznički školski centar Sarajevo